

# One Day Seminar Town District, K.S.P

## Amun :- Nghathal Presbyterian Church

Dt. 10<sup>th</sup> June 2017

Presented by - Rev. Siana Phaltual

### Topic :- BIAKNA DAN

- A. THUMAPUI :-** Pathian bia/ho hi English ah chu Worship ahi. Pathian a lopi zia leh a thilbawl thei zia hiatchian zia ah lau kawm leh zakawm ah chawihawina piakna ahi. Biakna hin Pathian chawihawina leh paknate, thupha chawinate leh i pawimaw dawtnate a huap a, a kiang ah kipiaklutna leh ama tawh kipawl na le ahi. Biakna kikhawp hi gingtute bawl dinga pawimaw tak leh i thugin nos.9 na ngei ale gingtu zosia te bawl ding ahi dan muthei ahi. Biak khawmna hi khat leh khat ki sukhattuana ahi kit hi. Biakna a hin Pathian ei siamtu chawihawina ahia, thagau lam ah annek khawmna leh kochuam suk pitinna le ahi. Biakna hun ahin mawpuakna nei ding kochuam in miguat anei sek a, mawpuakna neite hin ngaikhaw tak leh guntak ah pan a pawimaw ahi. Zia mawpuakna chuamchuam te leh biakna mun matdan dingte vak en suk hitiu.
- B. PATHIAN BIAKNA :-** Pathian biakna hi thagau lam ah ankuang luina ahia kochuam te chawpna ding ahin a pawimaw ahi. Ziakachun, biakna hun ah panmun neite'n titak leh feltak a bawl ding ahi. Tuni hin kochuam pawl dangte biakna dante gending hile'n tamtak gen ding um ina, ahinla genmanlo ding i hi zia un ei uh Presbyterian kochuam te mat dan tangpi gen ding ihu. Presbyterian kochuam te biakna dan hi, Apostol te damlai ah a bawldan gual ah phuaksa(liturgy) zui i hi puau a, lungthim gil taka eima dutui dan chiat ah biakna bawl te ihu. Ahiziakin, kisalawk taka bawl ding ahi, a chutilo chun biakna chu a dan pangai in a chia thei ahi. Pathian biakna hin a chung ah pali kigen te hi titak leh zatak a bawl ding ahi. Pakhat ngai pawimaw ah a dangte bangma ngailo ding le ahi diak puai.
- C. BIAKNA SUNG :-** Biakin sung lemtuak(arrangement) dan hi kochuam chuamchuam in dawidan leh chiapi dan anei chiat hi. Baptist te leh kochuam khenkhat te hin plateform lam ah pulpit kiang ahin kuama chulo in biakna anei sek ui. Khenkhat vangvang in pulpit le neilo in Lecturn khat chau a kawi ua, hun nei ding phawt chun a lua maisek ui. Presbyterian kochuam hin chu chiapi dan khat nei in Biakin sung hi a lemtuak ahi. Presbyterian kochuam in **Word and Sacrament** khel ah biakna hun ahin angai pawimaw a umlo zia kin pulpit leh sacrament table hi a ngai pawimaw in a za mama ahi. Pulpit leh Sacrament table leh Lecturn te hi kochuam committee hiatlo in chawn lumlet thei ei puai. Biakin hi munthiangtho ahia za dan thiam ten ding ahi. tulai i chia dan te'u hi ngaitua in gingtute a ding ah munthiangtho pen ah i nei uh Biakin hi Community hall ahungsuak ding hi gamlo lo a bang hi.
- (i) Chutna lemtuak dante :-** Biakin sung ah chutna daw dan hin umzia a nei ahi. Ut dandan ah, utna lam-lam ngatsak ziang thei hilo ahi. Munthiangtho lam ngavek ding ah daw ding ahi. Ei un vang i daw dandan un i daw mai sek ui.
- (ii) Pulpit, Sacrament table leh Lectern :-** Pulpit, Sacrament table leh Lectern te hi munthiangtho ahia, kochuam committee in Pathian thasang ah ding dinga mi a guatte'n kochuam te thagau lam ah a chawpna'u mun ahi. Mun pawimaw leh munzek ahia za ding ahi. Jerusalem temple ah munthiangtho leh munthiangtho pen kha Pathian um na mun ahiziakin Israel te'n a za mama u'i. Thuthunglui hunlai sang ah lopi zaw kochuam te hin munthiangtho i nei uh ahi. Pulpit, Sacrament table leh Lectern te hi Pathian nasepna mun leh Pathian in a mite a chawp theina ding ah Pathian thasang ah dinna mun, munthiangtho ahi.
- (iii) Chut leh dindan :-** Presbyterian kochuam hin biakna hun ah chut leh din hun hi kizilti ngailo in kitup takin zui ala nei hi. Kikhawm ding mi chu dak gitzaw in biakin ah lut in a pauchap a; Second Bell git masia chu chutsa'n la sakna hun a mang sek ahi. Second Bell gitzaw nung a lasakna himhim chu dinsa sak ahi tai. Biakna puitu in "Dinsa in la sa hitiu" ati ngai puai, hetsa ahi mai hi. Ahiziakin, tulai hin kuama'n ngaisakna neilo in 'Dinsa'n la sa hitiu' vel kitimai dan ahi. Sacrament guanggal hun a vang guanggaltu Pastor in chutsa'n la sa hitiu ati sek hi. A zia chu, dinsa lasakna chun Sacrament hawmlai chu a subuai thei ahi. Sacrament tilo biakna kikhawpna vang in chu chut leh dindan hi zui a nei hi.

(2)

#### D. KOCHUAM BIAKNA HUN DANGDANG TE :

(i) **Nilaini zan kikhawp** :- Nilaini zan kikhawp hi masang ah chun dan zokim chau kikhawpna in ala mangsek un, tuhun ahin chu kochuam mipite kikhawpna ah mat ahi tai. Nilaini zan ahin thununna, laklutna, pem laklutna leh nawsuanna hun ah mat ahi sek hi.

(ii) **Kiginni zan kikhawp** :- Kiginni zan hi pauchap gual zan ahi. Chuleh zia zan hi Pathian thu ah sharing nei nuam te a ding ale hun hawn ahi deu sek ahi. A tangpi in sermon na hun ah mat ahi sek hi.

(iii) **Pathianni zingkal kikhawp** :- Pathianni zingkal kikhawp hi kochuam ten Sunday School hun ah mat ahi sek ahi. Sunday School himaleh, Biakna hun tawh kibang ah mat ahi sek ahi.

(iv) **Pathianni zan** :- Pathianni zan hi mipi biakna hun ah mat ahisek hi.

(v) **Kichenna kikhawp** :- Kichenna kikhawp hi biakna chikhath ahi. Ziakachun, kochuam committee hetpilo a kichenna hi guanggal theilo ahi. Kochuam dan leh a gam dan ah a kicheng thei leh theilo uh chu saifel vek intiu in, zia chun kichenna um thei bep ding ahi. Ani leh hun dingte sukfel ahi phat leh biakin ah lekha tak hi ding ahi. Zia lekha hi a chawm pen in kalni sung hi ding ahi. Kicheng dingte hi Pawsal kum 21 leh numei kum 18 ahi ngai ding ahi. A kum tinglote hi a ting hun tak uh le kichensak mai ding ahi. Zia hi kochuam chia dan ahi.

Kochuam dan ah kichenna hi guanggal ahi phat leh biakin cheite, Biakin sung ah Mou ahunglut phat leh mipite ding hi kochuam chia dan ahi puai.

Zia te tilo ahin le KKP kikhawp sepkitna ah mat ahin, PWF kikhawp hi ziltawpni ah a kimang sek hi.

#### E. PANMUN NEITE :-

Biakna hun ah panmun neite; Chairman, pantu leh thugentu tite haw hi thagau lam ah mipite chawmtu ahiziak un mawpuakna a neilian khawp mai uh ahi. Biakna hun ah panmun hi zat chuamchuam a um a; Bible sim, pauchap leh thugente haw hi ahi. Panmun neite mawpuakna hi a sang mama a, ziakachun, paukam matdan te, kicheina lamte leh a bawldan/sepdan te chu a hawi thei pen a ding a kisaklawk ding ahi.

Biakna hun ah panmun neite'n paukam matdan hi thiam a ngai khawp mai ahi. Paukam kilawmlo tak gen khak ziak ahin mipite lungthim a kaimang thei ahi.

Panmun neite kicheidan hile ngaikhawk a pawimaw ahi. Kicheina lam hi ei un i ngaisaklo ziak le hi'n tin, kikhawpna hun ahin a za-umlo taktak in i kichei sek ua, theitawp ah kicheina lam hi ngaikhawk ahun khawp mai tai. I kicheina hin le kikhawpna hi a za-um sak thei ahi.

Panmun nei dingte'n i panna mun ding tawh kituaka a bawl ding dan te chu kizil masak deu a ngai ahi, Mipite puitu hina hin kilawmlo taka pui thei ahi ti hi hiating a pawimaw ahi. Nasem lai second bell git dikuan ah biakin sung ah mawk chawplut ziang ah chairman ahem ahiloleh, panmun khat valua lo kei ding ahi. Mi khenkhat in chu zia gual hi a chingten ui.

#### F. BIAKNA HUN AH PANMUN CHUAMCHUAM TE :-

##### (i) **Chairman :**

Biakna hun ah Chairman na hi ordination chang te a ahia, ahinla Upa te kidailona mun ah chun kochuam committee member 'Tualsung Upa' i titak teu hin biakna hun chu a pui sek ui. Chairman in Bible a sim ding hi ama lunglutna lam a mawk a sim ding ahi puai, Pathian be ding ah chialna(call to worship) lam zawk a sim ding ahi. Pathian be dinga chialna bawlo ah a nawpnawp a gen masaklo ding leh, a Bible sim chu a sermon lo ding ahi. Chairman chun mipite hiat ngeingei ding ah thu a gen ding ahi. Chairman chu mipite ngak ding hilo in, mipite masang ah chu ahi zia kin a tunvak uh a hawi hi. Chuleh, Chairman dingtu'n a kimanlo ziak a midang khat ala pang in ti maimai lo ding ahi. A guattu kochuam committee kiang ah hiatsakna bawl ding ahi. Nidanglai hun ah kimatdan te haw pai ahun ta ahi. Biakna hun ah chairman hi a puitu pen ahi zia kin a fel leh fello in thu a paw mama ahi.

##### (ii) **Secretary :**

Kochuam Biakna hun ah Secretary hin dinmun pawimaw tak mai alua ahi. Secretary na lianpen chu thupuan ahia, thupuan hi kikhawpna ah item khat ahi. Thupuan dingte chu chawmkim tak leh feltak ah apuan ding ahi. Kikhawpna programme a puan masak a, a zaw leh a dangte a puan ding ahi. Tawt kawm ah puanlo ding, za um tak a puan ding ahi. Kochuam thupuan hin biakna boruak a suse thei in, a supha thei ahi. Secretary a fel leh kochuam fel ahi mai hi.

**(iii) Pantu :**

Thupantu hi kitawsawtna leh thagau lam ah kikaihuaina'n guat ahi sek ahi. Kikhawm ngailote kikhawpna dinga guat ahi puai. Kochuam tin in pantu i guat hun uh tangpi chu kibang lo maleh, Sunday School, Nilai zan, Kigin zan te ah le guat thei a, biakna le a su za-um ahi. Ei un vang pantu hi nibik ni chou in i guat deu sek uh ahi.

**(iv) Thugentu :**

Biakna kikhawpna hun ahin thugentu hi thagau An hawmtu ahia, ziakachun thugenna hi a kingai pawimaw mama ahi. Ki maipha etna ah ki mawk guat ziang ding chi chu ahi puai. Chuleh, kochuam mi hi zing a thugenna khawp mama leh ngai peilo ti hi a dikzo lo deu ki hi mai thei ahi.

Pulpit leh Sacrament table hi mun thiango ahin, zia mun lua ding te haw hin ahun chan uh kochuam committee thu lo ah midang piak ziang hi bawl ngai hilo ahi.

Tulai ahin thugentu vak vel te lak ahin kochuam te pilvang a ngai khawp mai ahi. A thugente'u chun kochuam te chu anpha ah chawm hilo ah ziltilna diklo leh pawl hawl a um nuam ahi. Zia gual mite hi bial pastor leh Upa te mawpuakna ahi. Kochuam Upa khenkhat in khawksak in a nei puau a, zia gual Upa te chu bial Pastor in a hil ngam ding ahi. Zia gual ma chun, Upa ten le Pastor te diklona a gen ngam ding ahi. Thugen ah vak vel te hi kochuam ah a dinmun uh hiatchian beklo te hi chu gensak lo mai apha ahi. Chun, Pastor te le bial pawlam Pastor te hi thugen ah guat khelkhel hi kochuam te bat ahi pua, midang te vangvang chu bangma kiphaklam na ding a um puai. Vak vel te hi phalna piak ahina dingin kochuam thugin tawh kituak chou piak ding ahi.

**Thugentu ko dan** - Thugentu hi ko dan chuamchuam le um thei ina, kochuam tin ahin kibang khel puan a. A ziak kitanggualna deu chu "tunitak thugentu ding Rev/Upa/Tual Upa Khupa ahia, tu'n ko tai ti'u" ti hi phapen dingin ginchak a um hi. Khenkhat te'n i bawlsek uh kilawmlo kei chu thugentu kona'n la sa'i ti'u ti hi ahi. Pathian chawihawina'n lasa'i ti'u in sakzaw phat leh thugentu'n ahun lua ngal hen ti hikit leh phazaw ding ahi.

**Thugentu huntawp chan piak** - Thugentu huntawp chan piak hi kallak laka mat ahisek ahi. Zia hi nidang lai in kochuam te'n ala mangsek uh ahi. Chairman a pang khenkhat in thugen pa thugen sa kha velgen kit pawl a um sek un, zia te haw chu sukbeina ala kibawl pan deu chu ahi. Hun hung chia zel in Chairman te'n huntawp chan a tuk zing ding uh hi ngai pawimawna a lian mama tai. Ahinla, Pastor/Pro.Pastor leh District Chairman te chu piak ah kilawm mama kit chu ahiu, piak ding chi um tina ahi.

**(v) Thawlawm latdan :**

Thawlawm chungchang ahin genchian deu zawk na dingin thawlawm latdan leh piakdan in vak khen le'u hin nuamdeu ina.

~ **Thawlawm latdan** - Thawlawm latdan chungchang ahin ngaidan chuamchuam a um sek ahi. Thawlawm pantute'n Pulpit apat alat di'u ahem, ahiloleh Lectern apat...? Zia chungchang ahin khanglui lam ngaidan ah chun Pulpit chung apat nei hi ati deu uh ahi. Chuleh, Thawlawm lat ding te hi Pulpit chunglam ah kawidaw tei apha ahem, kawidaw lo di...? ti dawtna hile kochuam te ngaidan ah kibatlonau' chu ahi. Kochuam khenkhat in kawidaw teu ding phasa i um un, kawidaw a ngai puai ti pawl um dingin ka gingcha ahi. Zia thu ahin kochuam lianzaw leh changkang zaw te'n vang Pulpit chunglam hi ati khelkhel diaklo uh ahi.

~ **Thawlawm lat hun ah mipi ding thu ah** - Thawlawm lat hun sung ah mipi ding thu ahin, a lantu ding khenkhat in mipite bang ei hung ding sak mai sek ua, chia dan diktak a chun chairman te thu ahi. Chairman in Pathian za na'n mipite ding hitiu ati le ding bep ahi. Mipite ding hi Chairman khut ah um zaw ahi. Chuleh, mi khat leh ni in thawlawm ahung tuak uh, latna neina ah mipite Pathian zana ah ding hin Pathian chawihawina ahia, ahungtuak tu te zana ahi puai, Kochuam te i buai sek nau chu a tuak te chou ding mai uh hen ti bang ngaidan kinei sek ahi.

(4)

**(vi) Dak khentu leh La mapuitu :**

Dak khentu leh La mapuitu ding guatna hin kochuam te pil thei a ngai ahi. Kochuam sung ah mikhat popo guat ziang ding ahi puai. Biakna hi amau khut in a kinga nasa ahi. Tulai ei un vang sawl zaw penpen te bang i guat nuam sek ui. La mapuite hi a thiamlo uh chun Pathian kiang ah lungthim kilatna ding ahin chawkbuaitsu ahi zawi. Khenkhat kit chu khuang ha pipi khet ahin limna um dingin a gingcha'u in, mi khenkhat le chu a lim ziang a um tho nau, ahinla Pathian ah limna taktak lo a um thei ahi.

**G. THUKHAKNA :-**

Presbytery kochuam hin chia dan mumal tak ah nei a, zia chun Pathian biakna mipite'n kitup takin a kinei sek ahi. Mimal khat leh ni dawidan ah mawk kisang velvel theilo ahi. Biakna dan hi hawitak ah a chia thei na dingin kochuam puitute'n kochuam chia dan hawitak het a ngai a, eima dawidan bep het ah mipite puilo ding ahi. A tawpna ding in, Kochuam mipite lamdik ah a chia theina ding un kochuam puitute hi BENG-VAK DEU AH KI ZIL TAM hi a pawimaw ahi.

***Lekhabu et te:-***

- (i) Pathian Biakna kikaihuaina Dan bu.
- (ii) Presbyterian Kohran by - Rev. Saiaithanga
- (iii) Manipur Presbyterian Kohran chanchin by - Rev. C.S.Sitkil
- (iv) Kohran inrebawlina by - Rev. Z.T. Sangkhuma
- (v) Ziakloh Dan by - Rev. Z.T. Sangkhuma
- (vi) Seminar paper by - Rev. C.S. Sitkil